

**आकाशवाणी**

खबरां :-

- 1 कलकता हाई कोर्ट नै सीबीआई गी कोलकाता च मेडिकल कालेज ते अस्पताल च इक डाक्टरें दे बलात्कार ते हत्या दे मामले गितै जांच दे आदेश जारी कीते न।
- 2 उपराश्ट्रपति जगदीप धनखड़ होरें दिल्ली च भारत मंडपम थमां हर 'घर तिरंगा बाइक रैली' गी झंडी दस्सिये रवाना कीता।
- 3 केंद्री गृह मंत्री अमित शाह होरें आखेआ जे तिरंगा यात्रा देशभक्ति दी इक भावना ते भारत गी 2047 तोड़ी विकसित राश्ट्र बनाने दी बचनबद्धता दा इक्क चिन्ह ऐ।
- 4 आतंकवाद थमां निब्बड़ने लेई भारत-आस्ट्रेलिया सांझा कार्यदल दी 14मीं बैठक होई।
- 5 केंद्र सरकार नै स्वतंत्रता दिवस उप्पर 400 पंचैती राज प्रतिनिधियें गी साद्दा दिता ऐ।

<><><><><><>

**WB H.C CBI**

कलकता हाईकोर्ट नै कोलकाता दे इक्क मेडिकल कालेज ते अस्पताल च इक डाक्टर कन्नै होए दे बलात्कार ते हत्या दे मामले च सीबीआई सवां पड़ताल कराने दा आदेश दिता ऐ। अदालत नै पुलस गी मामले कन्नै सरबंधत सब्बै दस्तावेज सीबीआई गी सौंपने दा आदेश दिता ऐ। मुख न्यायाधीश टी.एस शिवगणनम ते न्यायमूर्ति एच. भट्टाचार्य हुंदी बैन नै पीड़िता दे माता-पिता ते होरनें दी याचिकाएं दी सुनवाई करदे होई एह आदेश दिता। अदालत नै सरकारी मेडिकल कालेज दे साबका प्रिंसीपल संदीप घोष होरें गी अनिश्चित समें लेई छुट्टी पर भेजी दिता ऐ। राज्य सरकार नै संदीप घोष होरें गी आरजीकर मेडिकल कालेज सवां इस्तीफा देने मगरा कल्ल नेशनल मेडिकल कालेज कोलकाता दा प्रिंसीपल नियुक्त कीता हा। एहदे कोला पैहलें हाईकोर्ट नै राज्य सरकार गी हूनै तोड़ी होई दी जांच दी रिपोर्ट देने लेई आखेआ हा। मुख्य भरै दे सरकारी अस्पतालें च रेजीडेंट डॉक्टर इस घटना दे विरोध च कल्लै सवां गै हड़ताल पर न।

<><><><><><>

**VP-HGTBR**

उपराश्ट्रपति जगदीप धनखड़ होरें आजादी आहले ध्याड़े कोलां पैहले अज्ज बड़डलै नमीं दिल्ली दे भारत मंडपम सवां हर घर तिरंगा बाइक रैली गी झंडी दस्सिये रवाना कीता। इस मौके पर केंद्री मंत्री गजेंद्र सिंह शेखावत, राम मोहन नायडू, किरेन रिजिजू ते मनसुख मांडविया होर मजूद हे। एह रैली मेजर ध्यान चंद नेशनल स्टेडियम च खत्म होई। श्री धनखड़ होरें इक्क सभा गी संबोधित करदे होई आखेआ जे हर घर तिरंगा अभियान आजादी दा अमृत महोत्सव दा हिस्सा ऐ जेदा मकसद देश दे हर घर च तिरंगा लहराना ऐ। उनें आखेआ जे एह अभियान हून इक्क आंदोलन बनी चुके दा ऐ। करोड़ां बद्दे लोक अपने-अपने घरें पर झंडा चाढ़ा करदे न, हर घर तिरंगा मुखै दी आजादी, गौरव ते विकसित भारत दे धेइये गी दस्सदा ऐ।

<><><><><><>

## Prez.-Add

राष्ट्रपति द्रौपदी मुर्मू होर 78में स्वतंत्रता दिवस दी पूर्व संज्ञा यानि कल देश गी संबोधित करंगन। एह संबोधन संज्ञा 7 बजे आकाशवाणी दे समूलचे राष्ट्रीय नीट वर्क ते दूरदर्शन उप्पर अंग्रेजी दे मगरा हिंदी च प्रसारित होग। एहदा मकामी भाषाएं च बी प्रसारण रातीं 9:30 बजे अपने-अपने मकामी नेटवर्क स्हाबै कीता जाग।

<><><><><><>

## IAF-Tirang Shakti

भारती हवाई फौज अपनी फौजी क्षमताएं दा प्रदर्शन करने ते अंतरराष्ट्री सहयोग गी मजबूत करने दे मकसद कन्ने वर्तमान च सब्बनें शा बड्डे बहूपखी हवाई युद्ध अभ्यास एक्स तरंग शक्ति दी मेजबानी करा'रदी ऐ। रणनीतिक रूप नै महत्वपूर्ण इस अभ्यास च कोई 11 देशें हिस्सा लैता जेदे च राफेल, एफ-18 ते इयरोफाइटर सनें बक्ख-बक्ख किस्में दे जहाज शामिल हे। तमिल नाडू दे सुलूर च भारतीय हवाई फौज दे हवाई ठकानें च हवाई कलाबाजी ते लड़ाकू जहाजें ते मिलिटरी हवाई जहाजें आस्सेया कीते गेदे करतबें, उत्थू मजूद किट्ठें दा मन मोही लैता। भारतीय हवाई फौज दी अगेत्री लड़ाकू जहाजें जियां जे राफेल, सुखोई 30 एम.के.आई, मिराज-2000, मिग-29 ते तेजस ते कन्ने गै सूद्रा ते प्रचंड हेलीकॉप्टरें, सी-130जे सुपर हरकूलस लड़ाकू जहाज, हवा च गै ईंधन भरने आहले आई.एल-78 लड़ाकू जहाजें बी अपना कौशल दस्सेया। एहदे अलावा फ्रांस, जर्मनी, स्पेन ते बरतानिया हवाई फौजें बी अपनियां अभ्यास सरबन्धी क्षमताएं दा लड़ाकू जहाज तायफोन ते इयरोफाइटर ते होरनें राएं अपने कौशल गी दर्शाया। एक्स तरंग शक्ति अभियान दा मकसद भारत दे रक्षा रिश्ते गी प्रतिभागी राश्ट्रें कन्ने बढ़ावा देना ऐ। मगरा स्वदेशी रक्षा क्षमताएं गी बी एहदे कन्ने प्रदर्शित करना शामिल ऐं इस अभियान कन्ने आपूं च विश्वास, अंतर अभियानें लेई नमें रस्ते खोजना ते हिस्सा लै'रदे राश्ट्रें बश्कार रणनीतिक सहयोग गी बदाना ऐ। इस अभियान दा पैहला गेड़ इस म्हीने दी 5मीं तरीक गी शुरू होई गेआ ते कल एहदा समापन होने दा कार्जक्रम ऐ। इस अभियान दा दुआ गेड़ 29 अगस्त गी शुरू होग ते 14 सितंबर गी जोधपूर दे एयर फोर्स स्टेशन च सम्पन्न होग। इस गेड़ च आस्ट्रेलिया, बांग्लादेश, ग्रीस, सिंगापुर, यूई ते अमरीका ते होरनें देश शामिल होंगन। पैहले गेड़ दे अभियान च सुलूर च इक संवाददाता सम्मेलन दौरान एयर चीफ मार्शल वी.आर चर्तुरवेदी होरें आखेआ जे अभियानें दौरान मकसद गी पूरा कीता गेआ ते हिस्सा लै'रदे राश्ट्रें बी इक-दुएं दे कौशल गी समझे ते बेहतरीन प्रदर्शन गितै सिक्खेआ सखाया। स्वदेशी लड़ाई आहले लड़ाकू जहाज तेजस दी शमूलियत दे बारे बोलदे होई उनें आखेआ जे अभियान दौरान लड़ाकू जहाज नै अपनी क्षमता दा प्रदर्शन कीता ऐ। जर्मनी दे एयरफोर्स प्रमुख Ingo Gerhartz होरें आकाशवाणी समाचार कन्ने खास गल्लबात च जमर्नी एयरफोर्स दी शमूलियत दे बारे जानकारी दितती। उनें आखेआ जे यूरोपीय मुख्य अभियान रलिये हिस्सा लै रदी ऐ ते एह बेहतरीन अनुभव ऐ। एक्स तरंग शक्ति दे बक्खबाहरें अंतरराष्ट्रीय रक्षा हवाबाही प्रदर्शन 2024 बी सुलूर दे हवाई फौजी स्टेशन च आयोजित कीती जा रदी ऐ। प्रदर्शनी च मशहूर भारतीय ते विदेशी कंपनियां बी हिस्सा लै रदियां न ते मिलिटरी उपकरणें ते हथियार प्रणाली गी प्रदर्शित बी कीता जा रदा ऐ। डीआरडीओ अध्यक्ष समीर वी. कामत होरें आखेआ जे डीआरडीओ फौजी बलें दी जरूरतें गी पूर करने गितै पूरी चाल्ती त्यार ऐ। उनें मेद बुज्जी जे अज्जे-कल्लै दे एडवांस मीडिया कामबैट

लड़ाकू ज्हाजें गी 2034-35 ते LCA AF MK-2 लड़ाकू ज्हाजें गी 2028-29 च शामिल कीता जाग।

<><><><><><>

### **Amit-Shah**

केंद्री गृह मंत्री अमित शाह होरें आखेआ ऐ जे तिरंगा यात्रा देशभक्ति दी भावना ऐ ते राष्ट्र दा भारत गी 2047 तोड़ी विकसित राष्ट्र बनाने दा इक चिन्ह बी ऐ। अहमदाबाद दे विराट नगर च अज्ज तिरंगा यात्रा दा उद्घाटन करदे होई शाह होरें आखेआ जे मुख्य प्रधानमंत्री नरेंद्र मोदी हुंदी अगुवाई च नमें मील दे पत्थर पार करा'रदा ऐ। उनें शैहरदारें गी खास करिये नौजवानें गी राष्ट्र दे विकास च अपना योगदान देने दी गुजारश कीती तां जे भारत गी 2047 तोड़ी विकसित राष्ट्र बनाया जाई सकै। उनें लोकें गी अपने-अपने घरें, दफतरें च तिरंगा झंडा फेहराने ते हर घर तिरंगा अभियान च हिस्सा लैने लेई बी अपील कीती।

<><><><><><>

### **India-Australia**

आतंकवाद थमां निब्वडने लेई बनाई गेदी भारत-आस्ट्रेलिया सांझा कार्यदल दी 14मीं बैठक कल नमीं दिल्ली च लगगी ही। बैठक च दुनिया भर च आतंकवाद दी चुनौतियें थमां पार पाने ते दौनें देशें बशकार इस क्षेत्र च सहयोग उप्पर चर्चा कीती गई। भारत ते आस्ट्रेलिया नै सब्बे चाल्ली दे आतंकवाद दी निंदेया कीती ते इस थमां निब्वडने लेई अंतरराष्ट्रीय सहयोग गी मजबूत कीते जाने दी जरूरते पर बल दितता। विदेश मंत्रालय नै आखेआ जे दौनें पखें बन्ने पारा आतंकवाद दी बी आलोचना कीती। बैठक च विदेश मंत्रालय च संयुक्त सचिव के.डी देवल होरें भारत ते आस्ट्रेलिया दे विदेश मंत्रालय दे वरिष्ठ अधिकारी रिचर्ड फीक्स होरें आस्ट्रेलिया दे प्रतिनिधिमंडल दी अगुवाई कीती।

<><><><><><>

### **TRAI-Spamcall**

भारतीय दूर संचार नियामक प्राधिकरण ट्राय नै टेली मार्केटिंग कंपनियें आस्सेया मोबाइल फोन उपभोक्ताएं गी अनधिकृत संदेश भेजने परां लगाम लाने लेई दूर संचार सेवा प्रदाताएं गी निर्देश जारी कीता ऐ। इस आदेश च आखेआ गेआ ऐ जे सब्बे एक्सेस सेवा प्रदाता गैर पंजीकृत Telemarketers दी तरफा कीती जाने आहली वायस प्रमोशनल काल तुरत बंद करन। संचार मंत्रालय नै आखेआ ऐ जे कोई गैर पंजीकृत प्रेषक व्यवसायिक वायस काल करने लेई अपने दूर संचार संसाधनें दा गलत इस्तेमाल करदा पाया गेआ तां उसी दऊं बरें तोड़ी लेई ब्लैकलिस्ट कीता जाग। इस च आखेआ गेआ ऐ जे ब्लैकलिस्टिंग दी अवधि दौरान कुसै बी एक्सेस प्रदाता आस्सेया नेह प्रेषकें गी कोई नमां दूर संचार संसाधन दिता नेई जाग। मंत्रालय नै एह बी आखेआ जे लोकें गी व्यवसायिक वायस काल करने लेई दूर संचार संसाधनें दा इस्तेमाल करने आहले सब्बे अपंजीकृत प्रेषकें गी इक महीने दे अंदर LDT प्लेट फार्म पर स्थानंतरित करी दिता जा।

<><><><><><>

### **Jaishankar-India US**

विदेश मंत्री एस. जयशंकर होरें आखेआ ऐ जे भारत दुनिया भरें च लोकवाद दा समर्थक ऐ। उनें भरोसा जताया जे जेड़े बी अमरीका दे नमें राष्ट्रपति होडन, ओह भारत कन्ने खरे सरबंध बनाडन। मंत्री होर भारत-अमरीका सरबंधें दे विकास ते अमरीका च रौहने

आहले भारतीय प्रवासिये गी संबोधित करा रदे हे। भारत-अमरीका सरबंधे पर डॉ. जयशंकर होरे आखेआ जे भारतीय प्रवासिये दा दपक्खी सरबंधे च इक्क बड़ा गै खरा योगदान ऐ। उने आखेआ जे एच वन वी नै भारत-अमरीका सरबंधे गी मजबूत करने च शीत युद्ध जिन्ना गै योगदान दिता ऐ। उने आखेआ जे अमरीका च कुसै बी होरने प्रमुख कठन दौर शा लंग्घारदी ऐ ते अगले 5 बरे तोड़ी नेह हालात रौहने दी मेद बुज्जी जा'रदी ऐ। उने मध्यपूर्व यूक्रेन, दक्खन पूर्वी एशिया दी घटनाएं ते कोविड दे लगातार प्रभाव गी चुनौतीपूर्ण दस्सया। डॉ. जयशंकर होरे आखेआ जे किश सरबंध मता महत्वपूर्ण होई जांगन ते किश मते चेंता आहले बनी जांगन।

<><><><><><>

### **Independence-Day**

केंद्र सरकार नै 78में स्वतंत्रता दिवस समारोह लेई देशभर दी पंचायते दी महिलाएं सने 400 नमें चुनोए दे प्रतिनिधिये गी विशेष अतिथि दे तौरा पर साद्दा दिता ऐ। पंचायती राज मंत्रालय कल नमी दिल्ली च पंचायते च महिला अगुवाई पर इक राश्ट्रीय कार्यशाला दा आयोजन करा'रदा ऐ। कार्यशाला च महिला नेताएं लेई पंचायते च चुनौतिये, सफलता दी कहानियां ते मकामी शासन च महिलाएं दी भागीदारी बदाने दे बारे चर्चा कीती जाग।

<><><><><><>

### **G-4 UNSC**

जी-4 देशे आखेआ ऐ जे संयुक्त राश्ट्र सुरक्षा परिषद च विजन सुधार दे एह परिषद वैश्विक चुनौतिये शां पार नेई पाई सकोग। संयुक्त राश्ट्र च भारत दे उप स्थाई प्रतिनिधि राजदूत आर. रविंद्र होरे सोमवार गी संयुक्त राश्ट्र सुरक्षा परिषद दी इक बैहस च जी-4 देशे दी तरफा दिते गेदे इक बयान च एह गल्ल आक्खी। उने आखेआ जे नुमायंदगी च विशेष रूपे नै स्थाई वर्ग दी कमी एहदी वनावट च मौजूदा असंतुलन गी होर बढ़ावा देग ते मौजूदा आलमी चुनौतिये शां पार पाने च अक्षमत होई जाग। उने आखेआ जे जी-4 देशे लेई महत्वपूर्ण संयुक्त राश्ट्र सुरक्षा परिषद दे कमतर प्रदर्शन दा मुख कारण अफ्रीका, लटिन अमरीका ते कैरेबियाई देशे दा गैर नुमायंदगी दा होना ऐ। तोआई स्थाई श्रेणी च एशिया प्रशांत दा घट्ट नुमायंदगी बी होना ऐ। राजदूत आर. रविंद्र होर संयुक्त राश्ट्र सुरक्षा परिषद च अंतरराश्ट्री शांति ते सुरक्षा गी कायम रखने उप्पर इक उच्च स्तर दी चर्चा गी संबोधित करा रदे हे।

<><><><><><>

### **Amrit-Udyan**

राश्ट्रपति द्रौपदी मुर्मू होर कल राश्ट्रपति भवन च सोए आहले सलाना अमृत उद्यान 2024 दा उद्घाटन करडन। अमृत उद्यान शुक्रवारें सवां 15 सितंबर तोड़ी आम जनता लेई खुल्ला रौहग।

<><><><><><>

### **IMD-Rainfall**

भारतीय मौसम विभाग नै अगले 7एं दिने दौरान पच्छमी हिमालय आहले खिते, उत्तर प्रदेश, हिमाचल प्रदेश ते पूर्वी भारत च भारी बरखें दी पेशनगोई कीती ऐ। अगले चऊं पंजे दिने दौरान हरियाणा, राजस्थान ते उत्तर पूर्वी भारत च भारी बरखें दी पेशनगोई कीती गेई ऐ। मौसम विभाग नै हफते दौरान मध्य प्रदेश, छत्तीसढ़, गोवा, गुजरात, मध्य महाराश्ट्र, जम्मू-कश्मीर, हरियाणा ते दिल्ली च बी हल्के थमां मझाटले दर्जे दी बरखा दी पेशनगोई कीती गेई ऐ।

**ID-Security**

78में स्वतंत्रता ध्याड़े पर कसै बी माड़ी घटना गी रोकने लेई समूलचे जम्मू क्षेत्र च सुरक्षा दे तगड़े इंतजाम कीते गेदे न। आकाशवाणी जम्मू दे संवाददाता नै खबर दिती ऐ जे प्रशासन नै आजादी आहले ध्याड़े गी रमानदारी कन्नै मनाए जाने लेई ते सुरक्षा गी यकीनी बनाए जाने गितै कोई कसर नेई छोड़ी ऐ। म्क्ख प्रोग्राम श्रीनगर दे बखशी स्टेडियम च होग जित्थे लेफ्टिनेंट गवर्नर मनोज सिन्हा होर सलामी लैडन ते प्रोग्राम दी अध्यक्षता करडन। प्रोग्राम च ज्हरां बद्दे लोकें दे शामिल होने दी मेद ऐ। जम्मू च लेफ्टिनेंट गवर्नर हूंदे सलाहकार आर.आर भटनागर होर मौलाना आजाद स्टेडियम च लग्गने आहले प्रोग्राम दी प्रधानता करंगन। सुरक्षा बलें श्रीनगर च निगरानी बदाई दिती दी ऐ। जम्मू-श्रीनगर राष्ट्रीय जरनैली शिड़का समेत बक्ख-बक्ख रस्तें पर जांच कार्रवाई चला करदी ऐ। जम्मू च प्रोग्राम आहली थाहरा दे आले-दुआले उच्ची ईमारतें पर प्लस ते सीआरपीएफ दे शार्प-शूटर तैनात कीते गेदे न। तकनीकी निगरानी बी कीती जा करदी ऐ।